

Ils mammals dal mund – lur istorgia e lur vita

■ Il 1999 è cumpari il cudesch «Ils mammals ils pli fascinants dal mund – lur istorgia e lur vita» sco emprim tom da la retscha «Egls averts». Il cudesch porchia in viadi fascinant tras il mund dals mammals. Bellas illustraziuns ed infurmaziuns interessantas mussan co ch'els èn sa sviluppads, co ch'els vesan ora e co ch'els sa cumportan. Tge è insumma in mammal? La plipart dals mammals sa sviluppa en il corp da la mamma en la madra (uterus) e sa nutrescha tras la placenta; in'exceptziun fan quels che ovan ed ils bursalins. Cura ch'els pitschens naschan, èn els gia sviluppads fermamain. Mammals èn animals lactants: las mammas laschan tetter lur pitschens. Il latg da la mamma vegn produci da glandas spezialas da la pel.



In'ulteriura caratteristica dals mammals è lur sang chaud: il corp ha adina la medema temperatura;

ella è per regla pli auta che quella dadora. Ils mammals pon uschia esser activs era sch'igl è fitg fraid. Per gidar a regular la temperatura ha ina gronda part dals mammals chavels u pail, blers schizunt sin tut il corp.

Classificaziun dals mammals

Ils mammals furman ina classa entaifer il reginavel dals animals. Las ulteriuras classas che fan part dal tschep dals animals cun spina dorsala (vertebrats) èn ils peschs, ils amfibis, ils reptils ed ils usschels. Ils mammals ils pli «primitivs» furman ils erizuns dal pichel lung ed ils ornitorincs: quests animals ovan sco ils reptils e na partureschan betg lur pitschens. Er ils bursalins sa sviluppan en moda differenta dals auters mammals.

Ils ulteriurs mammals sa laschan gruppar en las suandantas famiglias: animals senza dents (armadigls, smarschuns, magliafurmiclas), pangolins, maglia-insects (erizuns, misarogns, talpas e.a.), misarogns gigantics, primats (mesaschimngias e schimngias incl. l'uman), tupaiais cumins, puschè da terra, predaturs da la terra (urs, giats, lufs, fierngas, tais, ludras e.a.), predaturs da la mar (focas, liuns da mar, chavals da mar), colugos (numnads era lemurs sgulants), animals mezmieur (cun ils suturdents: chauns sgulants, vampirs, usschels-mezmieur), ruiders (ratuns, mieurs, raspuns, casturs, portga da mar e.a.), lieurs e cunigls, balenas e delfins, mammals cun duas unglas (portgas, hipopotams, chamels, lamas, giraffas, tschiervs, gazellas, antilopas, arments, nursas, chauras), mammals cun ina unglia (chavals, asens, zebras, rinoceros, tapirs), elefants, vatgas da mar.

L'evoluziun dals mammals

Ils emprims mammals han vivi avant var 200 milliuns onns. Quai mussan fossils dad ossa, dents u autras parts dal corp ch'ins ha chattà. A l'entschatta da questa perioda dominavan ils reptils la terra; in pau pli tard èn er sa sviluppads ils usschels. Durant ils emprims 100 milliuns onns han ils mammals stui viver ensemen cun ils dinosaurs. Sper ils dinosaurs sin la terra regivan pterosaurs en l'aria ed ictiosaurus en las mars. Ils emprims mammals eran pitschnets e sumegliavan stigliats. Els eran activs la notg e magliavan insects ed ovs da dinosaurs.

Avant var 65 milliuns onns èn ils dinosaurs morts ora ed ils mammals han cumenzà ad occupar pli vastamain la terra. Els na sumegliavan dentant anc betg ils mammals dad oz. Avant radund 55 milliuns onns èn sa sviluppads ils emprims primats, ils usschels-mezmieur ed ils chavals. Avant 37,5 milliuns onns vivevan blers animals parentads cun ils rinoceros; avant 24 milliuns onns dominavan las schimngias e blers animals che maglian ervas ed avant 5 milliuns onns èn sa sviluppads ils emprims umans.

Diversificaziun

Ils mammals ch'èn sa sviluppads vers la fin

dal temp terrian terziar (avant radund 25 milliuns onns) sumegliavan gia ils animals dad oz. En l'Asia, l'America dal Nord e l'Europa faschevan part gia trais quarts da las spezias a gruppas che existan oz. L'Australia e l'America dal Sid eran separadas dals auters continents dur milliuins onns. Là vivevan differents bursalins sco p.ex. ils kengurus. Avant dus milliuns onns èn creschidas ensemen l'America dal Sid e l'America dal Nord. Ils mammals dal nord han pudì sa derasar en il sid ed han stgatschà la gronda part dals bursalins. L'Australia è anc adina isolada dals auters continents. Uschia han pudì surviver qua bursalins pli spezialas fin al di dad oz.

Mammals che ovan

Be tschintg da las 4000 spezias da mammals ovan: l'ornitorinc australian, l'erizun dal pichel curt da l'Australia e da la Tasmania ed ils trais erizuns dal pichel lung da la Nova Guinea. Quests ornitorincs fan part dals monotremats (Monotremata), dals mammals che ovan. Or dals ovs naschan duas emnas pli tard ils pitschens che vegnan lura tezzads. Il latg sorta da tschertas glandas ed ils pitschens litgan si el. Ils mammals che ovan n'han betg tettels.

Bursalins


Ils bursalins sa sviluppan en moda dal tut-tatfat differenta da tut ils auters mammals. Cun exceptziun dals bursalins dal nas lung n'han els nagina placenta. In bun exempel è il kenguru: il pitschen crescha mo durant quatter emnas en il venter da la mamma e nascha lura sco schermigl senza pail; el mesira mo 2,5 cm e para plitost in verm ch'in kenguru. Strusch naschi tschertg el il tetel en il burset da la mamma. El tetta e tetta e crescha e sa sviluppa vinavant en il burset. Suenten in tschert temp creschan er ils dents ed il pitschen kenguru po laschar il tetel. Pli tard banduna el da temp en temp il burset che daventa lura memia pitschen per el suenter 10 mais.

Animals da placenta


In mammal che sa sviluppa en il venter da la mamma è in animal da placenta. Il temp ch'in mammal dovra per sa sviluppar en l'uterus da la mamma è different d'in animal a l'auter. Chauns naschan suenter 2 mais, chavriels suenter 10 e rinoceros suenter 16 mais. Il temp da la naschientscha è privlus per mamma ed uffants, perquai ch'els na pon betg fugir dals inimis. La plipart dals animals tschertgan in lieu ruasaiel e segir per parturir. Quai vala era per animals che vivan en trieps sco ils tschiervs. Quests pitschens naschan gia ferm sviluppads. Tar blers mammals stattan els en pe gia paucas uras suenter la naschientscha.

Tetter – tipic per mammals

Ils mammals tezzan lur pitschens. Il latg vegn or dals tettels (glandas da latg) che pendan en duas retschas vi dal venter da la mamma. Chauns e giats han plirs tettels.



Tipic per mammals



Tetter – ina da las caracteristicas tipicas dals mammals.

La tgira dal corp

Il fol dat chaud al mammal e protegia quel dal bletsch. El è dentant spert malnet e daventa in paradis per parasites che sa nutreschan da la pel morta u dal sang sut la pel. Ils mammals nettegian lur fol cun sa litgar, sgrattar, petgnar, scurlattar, rudlar, bagnar e sfruschar. Uschia eviteschan els malsognas e tegnan net eventualas pajas. La plipart dals mammals sa lavan sasezs. Fitg savens gidan els dentant er in l'auter. Questa «tgira dal corp sociala» ha duas raschuns: d'ina vart pon ils animals lavar parts da lur corp ch'els na pudessan betg cuntanscher sezs, da l'autra vart rinforza l'agid vicendaivel il spiert da cuminanza. Uschia surdattan ils animals in a l'auter er l'odur da la gruppa che permetta da distinguer ils confamigliars dals esters che entran en lur territori.

Bun appetit!

In animal pli grond cun sang fraid sco la serp po star emnas a la lunga senza maglia. Ils mammals agils cun sang chaud dovran dentant blera energia per mantegnair las funcziuns dal corp. Quest'energia survegna els da la maglia. Nus umans na duvrain betg uschè bled temp per «chattar» nossa vivonda. Nus giain simplamain en ina butia e cumprain quai che nus avain da basegn. Ma la gronda part dals mammals che vivan en la natira libra s'occupan l'entir di cun il da magliar. Els dovran bled'energia per esser activs, era sche las temperaturas èn bassas. Animals cun sang fraid èn alura marvs e plauns. Perquai van fors blers mammals a chatscha la saira u la damaun avant ch'il sulegl stgaudia ils animals da preda sco las serps u ils insects. Pli pitschen ch'il mammal è e pli savens ch'el sto magliar. Mammals cun corps pitschens perdan pli spert lur chalur. En regius fraidas han pli pitschens mammals gist temp avunda per sa nutrir. I dat mammals che na fan bunamain nagut auter che magliar, ruassar e puspè magliar. Els maglian mintga di tant sco quai ch'els paisan e pon murir da la fom entaifer trais uras. Il liun percenter maglia mintga di mo 1/40 dal pais da ses corp. La bucca, ils dents e las griffas dals mammals mussan tge ch'els maglian.

Ils senns dals mammals

Ils mammals èn sa sviluppads cun success surtut grazia als senns excellents: ils egls, las ureglias, il nas, il gust ed il senn da palpar. Mintga spezia ha in u plirs senns pli sviluppads. Uschia po mintga mammal s'adattar optimalmain a ses ambient. Ina talpa per exempel, che viva sut terra, dovra strusch ils egls. Ella è perquai bunamain tschorva. Cun ses gnif sensibel po ella dentant savurar e palpar sia preda (surtut verms da plievgia che vegnan en sia tauna). Nus umans percenter essan «animals dals egls». Ins suppona che nus vesain cun

ils egls quatter tschintgavels da quai che noss tscharvè «sa». Igl è pia grev da chapir ch'in animal sa viver mo cun agid dal nas u ch'in usschè-mezmieur «auda» ses ambient cun l'agid dals ecos d'ultrasun. Ma senns egls n'èn gnanc uschè buns – auters mammals, sco tschertas spezias da stigliats, vesan bled meglier. Da l'autra vart san ils umans e las schimngias distinguer colurs; la gronda part dals auters mammals vesan il mund mo alv e nair resp. blau e verd (dicromats).

Giugar...

Nus na pudain strusch imaginar in verm u ina furnicla che ioga. Quai che nus numain giugar para dad esser limità als mammals cun lur senns sviluppads, lur abilitad d'emprender e lur intelligenza. Surtut mammals giuvens giogan gugent. Els paran da giugar per spir plaschair, cuntarri als creschids ch'han da guardar per la vivonda e cumbatter per lur reviers. Ils schimpans giuvens curran suenter in a l'auter, las vulpettas sa rodlan e sa scoignan davant lur taunas ed ils chaunets fan termagls cun ballas. Ma pertge giogan ils pitschens mammals uschè gugent? Durant il gieù pon els trenar la musculatura e la coordinaziun. Els emperdan a surviver ed ad ir a chatscha, ad evitar privels ed a fugir. Mammals socials emperdan da communitar cun agid da suns e cun la lingua dal corp. Uschia pon els mussar lur posiziun en l'ierarchia da la gruppa.

... ed empernder

Mammals che maglian plantas ston far savens lungs viadis per chattar lur vivonda preferida. Per mammals che van a chatscha e maglian chavn èsi pli stentus e pli privlus da vegnir tar lur preda. Els ston suandar fastizs e tschiffar la preda. Ils animals da preda èn mintgant fitg fermes e pon blesar grevamain il rapinader. Sche la preda scappa, han els pers temp e fadia. Giuvens animals da rapina sco ils chauns ed ils giats exerciteschan ad ir a chatscha cun giugar. Per mussar a lur cumpogns ch'els vulan dentant mo giugar e betg attagar, han els tscherts cumportaments. In chagniel envida in auter a giugar: el sa metta giu cun la part davant, balla cun la cua e drizza enavant las ureglias. En nossa lingua vul quai dir: «Ve e gioga cun mail!»

La preschentaziun:

Steve Parker. Mammals. Ils mammals ils pli fascinants dal mund – lur istorgia e lur vita. (Collecziun «Egls averts», tom 1). Cuir 1999.

Dapli infurmaziuns:

chatta.ch/?id=1338&hiid=370
www.chattà.ch

Cuverta dal cudesch.